

1615

LETTRE A V PRESIDENT

Iannin, par Monsieur de Bouillon.

MONSIEVR,

Je vous auois escrit vn mot duquel ie n'ay eu responce, i'estime que la liberte n'est encores du tout perdue, & que ceux qui ont place & office dans le Conseil du Roy se peuuent communiquer ce qu'ils esperent, ou trament dans les affaires de l'Estat, pour en ces communications s'esclaircir des moyens qui s'offrent, pour les porter aux plus vtils Conseils, & s'esloigner de ceux qui peuuent nuire & affoiblir la dignité Royale, qui est la base, sur laquelle ce grand Estat a son principal appuy: l'ay veu les Remonstrances du Parlement, & l'Arrest du Conseil en suite de l'Arrest du Parlement du vingt-huictiesme Mars, & lesdites Remonstrances par lequel Arrest du Conseil sa Maiesté se monstre grandement offensée dudit Parlement, en ordonnant que l'Arrest & Remonstrances seront biffées & ostées des registres, & commandant au Grefier de la porter à sa Maiesté, n'estant pas

A

de robbe pour sçauoir bié les formes , ie
 prendray subit cognoissance de la chose
 qui est de l'aduis que ce grand & hono-
 rable Corps donne au Roy de plusieurs
 choses importantes à son seruice. Cela ne
 donnant nulle contrainte au temps ne à
 la forme que sa Maiesté & la Royne y
 voudront tenir pour y remedier, sa Ma-
 iesté semble remettre ses remedes à la
 réponse des Cayers des Estats , lesquels
 Estats , ainsi que vous & moy le sçauons,
 ont eu peu ou point de liberté, & moins
 de satisfaction rapportee dans les Pro-
 uinces: ce qui laisse peu d'esperance qu'en
 la réponse des cayers il y aye du conten-
 tement pour le public. L'ouuerture
 faicte par ses Remonstrances donne
 occasion à sa Majesté, & moyen en les
 receuant de satisfaire à plusieurs mau-
 uais preiugez qu'on fait de la suite des
 affaires , puis que l'ouuerture aux reme-
 des est mal prinse & mal receuë, qu'on
 void des changemens notables aux reso-
 lutions prinsees comme du droict annuel
 & venalité des Offices qu'on a approu-
 uées & données solennellement aux
 Estats, & depuis confirmées à tout le
 Royaume, & l'un & l'autre laissez cōme

ils estoient auparauant, contre ce qui auoit esté arresté & promis si solemnellement, & commandé aux Deputez generaux de ceux de la Religion de prendre le breuet de leurs assembléees à Gergeau, nonobstant leurs iustes Remonstrances & despesches faites pour empescher que ceux de la Religion n'allassent ailleurs, sans autre cause du soir au lendemain, on trouua bon comme aussi c'estoit le meilleur, qu'on allast à Grenoble, ces exemples feront foy de la mutation des Conseils, l'on parle de l'execution du Mariage, en quoy il semble qu'on vueille augmenter les craintes que ceux qui aiment l'Estat en peuuent prendre, on n'en communique les progrès qu'à peu on point de personnes, de celles qui principalement le deuroient sçauoir, on void depescher & sceller plusieurs commissions. Monsieur de Sauoye de iour à autre opprimé des forces du Roy d'Espagne sur pied en diuers endroits, & à mesme tēps celles de France y seront, à quoy cela, sinon pour violenter le droit du Roy & del'Estat en faueur de ses plus florissans ennemis. Qui est-ce qui dit qu'il n'est pas bon que le Roy se marie que l'Infan-

te ne soit la plus grande Princeſſe de l'Europe, ſur laquelle on puiſſe ietter les yeux. Qui ne ſçait que les Mariages entre les Grands doiuent marier les perſonnes & non les Eſtats, & qu'en ceſte conduite nul n'a trouué ceſte Alliance mauuaife : Mais le proceder & preparatifs ſuſdits, font craindre & croire à pluſieurs, que le but de ceſte Alliance ne ſert qu'à nous ietter dans le maux paffez, de nous troubler, nous faire perdre nos anciens Alliez, & nous contraindre avec ceux qui nous tireront de la grandeur de noſtre Eſtat, à l'exaltation du leur, de noſtre repos aux troubles, & de la balâce qu'à touſiours gardee la France aux affaires de l'Europe, à vne conionction forcee & neceſſitée avec l'Eſpagne, la crainte de ces maux eſt legitime, & le deſir des remedes doit eſtre nay dans le courage des vrayſ François, pour prier Dieu d'inſpirer au cœur de la Royne, de le vouloir deſtourner ainſi qu'il ſemble qu'il eſt facile : Quand on voudra avec la plus grande partie de l'Eſtat deliberer de ces choſes, prendre & receuoir les aduis pour y remedier, n'épargnant aucun qu'on cognoiſtra autheur du mauuais

Conseil, & qui portera ceux du public à sa seule consideration pour dommageables, qu'ils sont au general, ainsi on recognoistra ceux qui aiment leurs Majestez & l'estat, & non pas les fausses couleurs données par calomnies iournellement receuës plus que les veritez. Et d'autāt que je sçay en estre assailly autāt que nul autre, je desire mettre mes actions au jour. On dit que ie fais des leuées, cela est faux, mais quand je m'asseurerois de mes amis, que ferois-je que chacun en France ne face? Que puis-je estimer, qu'on leue des forces en France pour le seruice du Roy, & que je n'y sois employé & n'en ayes le principal commandement. Que si on ne m'y employe & autres bons Francois, n'est-ce pas pour faire accroire que ces forces seront jetées à l'appuy des factions contraires à l'Estat. Cela estant, pourquoy se laisser opprimer, sās lâcheté ou trahison? Vous Mōsieur qui aimez le Roy & l'estat, raschez qu'on jette avec loisir les yeux sur les remedes & sur la longueur & diuersité des accidens, afin d'auancer ceux-là, & reculer ceux-cy, à quoy je contribuëray fidelement & courageusement tout

ce qui sera à moy, sãs qu'il y aye de mon particulier ien'aurois obmis le dény de ce qui m'est deu à cause de Sedan. La protection de ce lieu, comme seruant à monstrier qu'on y obmet bien le droit du Roy, & à vne chose tres-importante, laquelle nonobstât ces mauuaises affections je conserueray Dieu aydant pour le seruice du Roy & de la France, sans que la fraude ny autres puissances m'en puissent diuertir, ne laissant neãtmoins plusieurs Sedans & dehors, & en tirer des consequences, qu'on veut abbattre les bons François, & les places qu'ils tiennent en leurs mains, c'est ce que i'estime ne vous deuoir écrire en ces occurrences, & en cét endroit vous asseurer aussi que pour vostre particulier, ie feray tousiours

MONSIEVR

Vostre bien humble à vous faire seruice,
HENRY DE LA TOVR.

A Sedan ce 19. Iuin 1615.

